

Visoki predstavnik Inzko sa europskim povjerenikom za pravdu Reyndersom



Tokom ovotjedne posjete Briselu, visoki predstavnik Valentin Inzko sastao se sa europskim povjerenikom za pravosuđe Didierom Reyndersom, sa kojim je razgovarao o trenutnom stanju u pravosuđu Bosne i Hercegovine i nepoštivanju vladavine prava na domaćoj političkoj sceni.

“U svom prvom članu, Aneks 4. Općeg okvirnog sporazuma za mir jasno kaže da BiH treba biti demokratska zemlja koja funkcioniра u skladu sa vladavinom prava. Međutim, to se uglavnom ne poštuje. Vladavina prava mora se radikalno ojačati a borba protiv korupcije treba postati stvarni prioritet ukoliko Bosna i Hercegovina želi biti stabilna i prosperitetna demokratska država, izgrađena na čvrstim temeljima. To su oblasti na osnovu kojih treba donositi sud o iskrenosti političara kada je riječ o njihovom deklariranom opredjeljenju za put prema EU,” rekao je visoki predstavnik.

Visoki predstavnik je iskoristio ovu prigodu da ukratko iznese ključne probleme u oblasti vladavine prava, uključujući i nepoštivanje odluka domaćih i međunarodnih pravosudnih institucija. Spomenuo je i stalne napade na Ustavni sud BiH – državno pravosudno tijelo čvrsto utemeljeno Daytonskim mirovnim sporazumom – i dugogodišnje neprovođenje presude Ustavnog suda BiH o Mostaru, kao i presude Europskog suda za ljudska prava u predmetu Sejdić-Finci.

„Desetine tisuća građana ne mogu iskoristiti svoja građanska prava jer ne mogu glasovati u Mostaru i ne mogu se kandidirati na izborima za brojne državne funkcije. Ukoliko Bosna i Hercegovina želi napredovati i zaustaviti odlazak građana iz zemlje, ona mora odlučno krenuti u rješavanje izazova u oblasti vladavine prava”, dodao je visoki predstavnik.

Sugovornici su razgovorali i o prijedlogu novih pravila za proširenje, situaciji u vezi sa Visokim sudskim i tužiteljskim vijećem i Priebeovom izvješću.

Visoki predstavnik u srijedu je također imao priliku susresti se sa potpredsjednicom Europske komisije za vrijednosti i transparentnost Verom Jourovom, te ju podsjeti da pripadnici nacionalnih manjina kao što su Židovi i Romi ne mogu biti kandidati za Dom naroda niti Predsjedništvo BiH, uprkos nekoliko presuda Europskog suda za ljudska prava koje nalažu suprotno.